

pour luy presenter cette ieune Hiroquoise: celuy qui l'auoit prise voyant tout le monde assis de part & d'autre, se leua & harangua en cette [245] sorte. Escoutez, François, ie vous vais tancer, car que pourroit faire autre chose vn gros animal comme moy, qui prend la hardieffe de parler deuant des Capitaines? Si i'estois Capitaine i'aurois droit de parler; ie ne fais qu'un chien, si faut-il que ie parle, & que ie vous fasse vne querelle d'amitié. Nos Peres & nos vieux Capitaines se font entr'aimez, ils font morts maintenant, nous nous entr'aimons & François & Sauvages; nous nous entr'aimons, öüy nous nous entr'aimons: c'est pourquoy il eust esté biẽ à propos de voir quelques-vns de vos ieunes gens parmy nous à la guerre; mais cela nous ayant manqué, nous auons fait ce que nous auons pũ. Voicy vne ieune prisonniere que nous vous presentons pour mettre en la place de l'un des trois François qui ont esté tuez il y a quelque temps bien près d'icy: ie voy encor le sang tout rouge qui accuse la cruauté de nos ennemis & des vostres: ce present en cachera vne partie, c'est peu de chose, mais c'est tout ce que nous auons, le reste ayant esté tué: si nous eussions esté secourus, nous eussions fait dauantage, mais on nous a quitté de tous costez. Ce fut à peu près le sommaire de [246] son discours, qui finit par cette acclamation hô, hô, hô, tirée du creux de l'estomach de tous ses compagnons. Cela fait, on presente cette pauvre ieune femme, qui me parut cette fois fort triste, & me semble que baissant les yeux elle ietta quelques larmes: on luy demanda neantmoins si elle n'estoit pas bien-aise d'estre donné à vn si braue Capitaine, qui l'aimeroit fort, & qui la mettroit avec sa Sœur; elle tesmoigna qu'elle